

四庫全書

史部

欽定四庫全書

左傳紀事本末卷四十一

詹事府詹事高士奇撰

鄭莊強國

克段  
公子爭立附

諸

隱公元年初鄭武公娶於申曰武姜生莊公及共叔段  
莊公寤生驚姜氏故名曰寤生遂惡之愛共叔段欲立  
之亟請於武公公弗許及莊公即位為之請制公曰制  
巖邑也虢叔死焉他邑唯命請京使居之謂之京城大

叔祭仲曰都城過百雉國之害也先王之制大都不過參國之一中五之一小九之一今京不度非制也君將不堪公曰姜氏欲之焉辟害對曰姜氏何厭之有不如早為之所無使滋蔓蔓難圖也蔓草猶不可除況君之寵弟乎公曰多行不義必自斃子姑待之既而大叔命西鄙北鄙貳於己公子呂曰國不堪貳君將若之何欲與大叔臣請事之若弗與則請除之無生民心公曰無庸將自及大叔又收貳以為己邑至於廩延子封曰可

矣厚將得衆公曰不義不暱厚將崩大叔完聚繕甲兵  
具卒乘將襲鄭夫人將啓之公聞其期曰可矣命子封  
帥車二百乘以伐京京叛大叔段段入於鄆公伐諸鄆  
五月辛丑大叔出奔共書曰鄭伯克段於鄆段不弟故  
不言弟如二君故曰克稱鄭伯譏失教也謂之鄭志不  
言出奔難之也遂寘姜氏於城穎而誓之曰不及黃泉  
無相見也既而悔之穎考叔為穎谷封人聞之有獻於  
公公賜之食食舍肉公問之對曰小人有母皆嘗小人

之食矣未嘗君之羹請以遺之公曰爾有母遺緊我獨  
無賴考叔曰敢問何謂也公語之故且告之悔對曰君  
何患焉若闕地及泉隧而相見其誰曰不然公從之公  
入而賦大隧之中其樂也融融姜出而賦大隧之外其  
樂也洩洩遂為母子如初君子曰賴考叔純孝也愛其  
母施及莊公詩曰孝子不匱永錫爾類其是之謂乎  
冬十月鄭共叔之亂公孫滑出奔衛衛人為之伐鄭取  
廩延鄭人以王師虢師伐衛南鄙請師於邾邾子使私

於公子豫豫請往公弗許遂行及邾人鄭人盟於翼不  
書非公命也 二年冬鄭人伐衛討公孫滑之亂也

三年冬齊鄭盟於石門尋盧之盟也庚戌鄭伯之車僨  
於濟 四年宋公陳侯蔡人衛人伐鄭圍其東門五日  
而還 秋諸侯復伐鄭宋公使來乞師公辭之羽父請  
以師會之公弗許固請而行諸侯之師敗鄭徒兵取其  
禾而還 五年四月鄭人侵衛牧以報東門之役衛人  
以燕師伐鄭鄭祭足原繁洩駕以三軍軍其前使曼伯

與子元潛軍軍其後燕人畏鄭三軍而不虞制人六月  
鄭二公子以制人敗燕師於北制君子曰不備不虞不  
可以師 宋人取邾田邾人告於鄭曰請君釋憾於宋  
敝邑為道鄭人以王師會之伐宋入其郛以報東門之  
役 宋人伐鄭圍長葛以報入郛之役也 六年五月  
庚申鄭伯侵陳大獲往歲鄭伯請成於陳陳侯不許五  
父諫曰親仁善鄰國之寶也君其許鄭陳侯曰宋衛實  
難鄭何能為遂不許君子曰善不可失惡不可長其陳

桓公之謂乎長惡不悛從自及也雖欲救之其將能乎  
商書曰惡之易也如火之燎於原不可鄉邇其猶可撲  
滅周任有言曰為國家者見惡如農夫之務去草焉芟  
夷蘊崇之絕其本根勿使能殖則善者信矣 秋宋人  
取長葛 九年宋公不王鄭伯為王左卿士以王命來  
告伐宋會於防謀伐宋也 十年會於中丘為師期也

餘見隱  
公攝國

蔡人衛人邾人不會王命秋七月庚寅鄭師  
入郊猶在郊宋人衛人入鄭蔡人從之伐戴八月壬戌



鄭伯圍戴癸亥克之取三師焉宋衛既入鄭而以伐戴  
召蔡人蔡人怒故不和而敗九月戊寅鄭伯入宋冬齊  
人鄭人入邾討違王命也 十一年夏公會鄭伯於邾  
謀伐許也 鄭伯將伐許五月甲辰授兵於大宮公孫  
闕與潁考叔爭車潁考叔挾輶以走子都拔棘以逐之  
及大逵弗及子都怒秋七月公會齊侯鄭伯伐許庚辰  
傳於許潁考叔取鄭伯之旗螿弧以先登子都自下射  
之顛瑕叔盈又以螿弧登周麾而呼曰君登矣鄭師畢

登壬午遂入許許莊公奔衛齊侯以許讓公公曰君謂許不共故從君討之許既伏其罪矣雖有君命寡人弗敢與聞乃與鄭人鄭伯使許大夫百里奉許叔以居許東偏曰天禍許國鬼神實不逞於許君而假手於我寡人寡人唯是一二父兄不能共億其敢以許自為功乎寡人有弟不能和協而使餬其口於四方其況能久有許乎吾子其奉許叔以撫柔此民也吾將使獲也佐吾子若寡人得沒於地天其以禮悔禍於許無寧茲許公

復奉其社稷唯我鄭國之有請謁焉如舊昏媾其能降  
以相從也無滋他族實偏處此以與我鄭國爭此土也  
吾子孫其覆亡之不暇而况能裡祀許乎寡人之使吾  
子處此不唯許國之為亦聊以固吾圉也乃使公孫獲  
處許西偏曰凡而器用財賄無寘於許我死乃亟去之  
吾先君新邑於此王室而既卑矣周之子孫日失其序  
夫許大岳之胤也天而既厭周德矣吾其能與許爭乎  
君子謂鄭莊公於是乎有禮禮經國家定社稷序民人

利後嗣者也許無刑而伐之服而舍之度德而處之量力而行之相時而動無累後人可謂知禮矣鄭伯使卒出犴行出犬雞以詛射潁考叔者君子謂鄭莊公失政刑矣政以治民刑以正邪既無德政又無威刑是以及邪邪而詛之將何益矣 鄭息有違言息侯伐鄭鄭伯與戰於竟息師大敗而還君子是以知息之將亡也不度德不量力不親親不徵辭不察有罪犯五不韙而以伐人其喪師也不亦宜乎冬十月鄭伯以虢師伐宋壬

成大敗宋師以報其入鄭也宋不告命故不書凡諸侯有命告則書不然則否師出臧否亦如之雖及滅國滅不告敗勝不告克不書於策 桓公十五年許叔入於許公會齊侯於艾謀定許也 莊公二十九年夏鄭人侵許凡師有鐘鼓曰伐無曰侵輕曰襲 閔公二年鄭人惡高克使帥師次於河上久而弗召師潰而歸高克奔陳鄭人為之賦清人 隱公七年陳及鄭平十二月陳五父如鄭涖盟壬申及鄭伯盟欵如志洩伯曰五父

必不免不賴盟矣鄭良佐如陳蒞盟辛巳及陳侯盟亦  
知陳之將亂也冬鄭公子忽在王所故陳侯請妻之  
鄭伯許之乃成昏八年四月甲辰鄭公子忽如陳逆  
婦媯辛亥以媯氏歸甲寅入於鄭陳鍼子送女先配而  
後祖鍼子曰是不為夫婦誣其祖矣非禮也何以能育  
九年冬北戎侵鄭鄭伯禦之患戎師曰彼徒我車懼  
其侵軼我也公子突曰使勇而無剛者嘗寇而速去之  
君為三覆以待之戎輕而不整貪而無親勝不相讓敗

不相救先者見獲必務進進而遇覆必速奔後者不救則無繼矣乃可以逞從之戎人之前遇覆者奔祝聃逐之衷戎師前後擊之盡殪戎師大奔十一月甲寅鄭人大敗戎師 桓公六年夏北戎伐齊齊侯使乞師於鄭鄭太子忽帥師救齊六月大敗戎師獲其二帥大良少良甲首三百以獻於齊於是諸侯之大夫戍齊齊人饋之餼使魯為其班後鄭鄭忽以其有功也怒故有郎之師公之未昏於齊也齊侯欲以文姜妻鄭太子忽太子

忽辭人問其故大子曰人各有耦齊大非吾耦也詩云  
自求多福在我而已大國何為君子曰善自為謀及其  
敗戎師也齊侯又請妻之固辭人問其故大子曰無事  
於齊吾猶不敢今以君命奔齊之急而受室以歸是以  
師昏也民其謂我何遂辭諸鄭伯 十年冬齊衛鄭來  
戰於郎我有辭也初北戎病齊諸侯救之鄭公子忽有  
功焉齊人餽諸侯使魯次之魯以周班後鄭鄭人怒請  
師於齊齊人以衛師助之故不稱侵伐先書齊衛王爵



也 十一年春齊衛鄭宋盟於惡曹 鄭昭公之敗北  
戎也齊人將妻之昭公辭祭仲曰必取之君多內寵子  
無大援將不立三公子皆君也弗從 夏鄭莊公卒初  
祭封人仲足有寵於莊公莊公使為卿為公娶鄧曼生  
昭公故祭仲立之宋雍氏女於鄭莊公曰雍姑生厲公  
雍氏宗有寵於宋莊公故誘祭仲而執之曰不立突將  
死亦執厲公而求賂焉祭仲與宋人盟以厲公歸而立  
之 秋九月丁亥昭公奔衛己亥厲公立 十二年夏

公欲平宋鄭秋公及宋公盟於句瀆之丘宋成未可知也故又會於虛冬又會於龜宋公辭平故與鄭伯盟於武父遂帥師而伐宋戰焉宋無信也君子曰苟信不繼盟無益也詩曰君子屢盟亂是用長無信也十三年春宋多責賂於鄭鄭不堪命故以紀魯及齊與宋衛燕戰不書所戰後也鄭人來請修好十四年春會於曹曹人致餼禮也夏鄭子人來尋盟且修曹之會冬宋人以諸侯伐鄭報宋之戰也焚渠門入及大逵伐東郊

取牛首以大宮之椽歸為盧門之椽 十五年祭仲專  
鄭伯患之使其壻雍糾殺之將享諸郊雍姬知之謂其  
母曰父與夫孰親其母曰人盡夫也父一而已胡可此  
也遂告祭仲曰雍氏舍其室而將享子於郊吾惑之以  
告祭仲殺雍糾尸諸周氏之汪公載以出曰謀及婦人  
宜其死也夏厲公出奔蔡六月乙亥昭公入 秋鄭伯  
因櫟人殺檀伯而遂居櫟冬會於袤謀伐鄭將納厲公  
也弗克而還 十六年春正月會於曹謀伐鄭也 夏

伐鄭 秋七月公至自伐鄭以飲至之禮也 十七年

初鄭伯將以高渠彌為卿昭公惡之固諫不聽昭公立  
懼其殺已也辛卯弑昭公而立公子亶君子謂昭公知  
所惡矣公子達曰高伯其為戮乎復惡已甚矣 十八

年秋齊侯師於首止子亶會之高渠彌相七月戊戌齊  
人殺子亶而輟高渠彌祭仲逆鄭子於陳而立之是行  
也祭仲知之故稱疾不往人曰祭仲以知免仲曰信也

攷異史記子亶自齊襄公為公子之時嘗會鬪相仇及

會諸侯祭仲請子亶無行子亶曰齊彊而厲公居櫟  
即不往是率諸侯伐我內厲公我不如往往何遽必  
辱且又何至是卒行於是祭仲恐齊并殺之故稱疾  
子亶至不謝齊侯齊侯怒遂伏甲而殺子亶高渠彌  
亡歸歸與祭仲謀召子亶弟公子嬰於陳而立之是  
為鄭子

莊公十四年鄭厲公自櫟侵鄭及大陵獲傅瑕傅瑕曰  
苟舍我吾請納君與之盟而赦之六月甲子傅瑕殺鄭

子及其二子而納厲公初內蛇與外蛇鬪於鄭南門中  
內蛇死六年而厲公入公聞之問於申繻曰猶有妖乎  
對曰人之所忌其氣馘以取之妖由人興也人無釁焉  
妖不自作人棄常則妖興故有妖厲公入遂殺傅瑕使  
謂原繁曰傅瑕貳周有常刑既伏其罪矣納我而無二  
心者吾皆許之上大夫之事吾願與伯父圖之且寡人  
出伯父無裏言入又不念寡人寡人憾焉對曰先君桓  
公命我先人典司宗祏社稷有主而外其心其何貳如

之苟主社稷國內之民其誰不為臣臣無二心天之制也子儀在位十四年矣而謀召君者庸非貳乎莊公之子猶有八人若皆以官爵行賂勸貳而可以濟事君其若之何臣聞命矣乃縊而死 十六年鄭伯治與於雍糾之亂者九月殺公子闞刑強鉏公父定叔出奔衛三年而復之曰不可使共叔無後於鄭使以十月八日良月也就盈數焉君子謂強鉏不能衛其足

臣士奇曰鄭莊公春秋諸侯中梟雄之姿也其陰

謀伎忍先自翦弟始而後上及於王下及於四鄰  
與國夫兄弟一本天屬最親而養驕長惡以行其  
芟夷之計及泉誓毋敢施於所生況他人乎自是  
雄心弗戢修廩延之鄰則伐衛報東門之役則侵  
衛為邾人釋取田之憾則伐宋忿請成之弗許則  
侵陳假王命以興師則伐宋兼三國之師則取戴  
託違命以虐小則入邲飾鬼神之不逞則入許怒  
周班之見後則戰郎其他連衡植黨相從牲歎難



一二數莊公亦一世之雄哉然而不能崇固國本  
內多寵嬖三公子皆疑於君致忽突子亶子儀之  
際爭弑禍興國內大亂則皆陰謀忮忍之所積有  
以取之而後知天道之不誣也昭公屢經行陣其  
救齊也大敗戎師獲甲首三百功最多亦非盡柔  
弱者其辭文姜曰在我而已大國何為不可謂不  
自立而當時因其見逐於突惋惜歎恨於坐失齊  
援至引有女同車之詩為刺不知忽不幸而昏於

齊則彭生之禍不在魯桓而在鄭忽矣安見人各有耦之言為失計也祭仲足有寵莊公使為卿為公娶鄧曼而生忽故祭仲立之則祭仲者忽之所倚為腹心者也古有託六尺之孤寄百里之命臨大節而不可奪者仲見執於宋遽歸而立厲公逐昭公又復以專見忌出厲公而納昭公反面事仇行同狗彘子亶之會於首止也齊人討高渠彌之弑並殺之仲知之故稱疾不往人謂其能以知免不

知仲特一貪生畏死之小人耳臣而盡如仲國家  
奚賴哉若原繁乃可謂守死不貳者矣忽入而終  
出突出而終入子亶子儀立而不終當是時鄭有  
四君棼若亂絲矣蛇妖告變事非偶然厲公存共  
叔文後以其篡逆之氣類同也然而君子原四公  
子之禍未嘗不追恨於莊公也

左傳紀事本末卷四十一

欽定四庫全書

史部

左傳紀事本末卷四

四二至

詳校官侍講學士<sub>臣</sub>平恕

編修<sub>臣</sub>裴謙覆勘

總校官庶吉士<sub>臣</sub>何思鈞

校對官中書<sub>臣</sub>嵇承志

謄錄監生<sub>臣</sub>胡宗高

欽定四庫全書

左傳紀事本末卷四十二

詹事府詹事高士奇撰

鄭穆公之立

禮本穆公之裁附

僖公十六年冬十一月乙卯鄭殺子華 二十四年鄭

子華之弟子臧出奔宋好聚醵冠鄭伯聞而惡之使盜

誘之八月盜殺之於陳宋之間君子曰服之不衷身之

災也詩曰彼己之子不稱其服子臧之服不稱也夫詩

曰自詒伊戚其子臧之謂矣夏書曰地平天成稱也

三十年晉侯秦伯圍鄭初鄭公子蘭出奔晉從於晉侯  
伐鄭請無與圍鄭許之使待命於東鄭石甲父侯宣多  
逆以為大子以求成於晉晉人許之 三十一年鄭洩  
駕惡公子瑕鄭伯亦惡之故公子瑕出奔楚 三十三年  
楚令尹子上伐鄭將納公子瑕門於桔柣之門瑕覆  
於周氏之汪外僕髡屯禽之以獻文夫人斂而葬之鄆  
城之下 宣公三年冬鄭穆公卒初鄭文公有賤妾曰

燕姑夢天使與已蘭曰余為伯儵余而祖也以是為而  
子以蘭有國香人服媚之如是既而文公見之與之蘭  
而御之辭曰妾不才幸而有子將不信敢徵蘭乎公曰  
諾生穆公名之曰蘭文公報鄭子之妃曰陳媯生子華  
子臧子臧得罪而出誘子華而殺之南里使盜殺子臧於  
陳宋之間又娶於江生公子士朝於楚楚人醜之及葉  
而死又娶於蘇生子瑕子俞彌俞彌早卒洩駕惡瑕文  
公亦惡之故不立也公逐羣公子公子蘭奔晉從晉文

公伐鄭石癸曰吾聞姬媯耦其子孫必蕃媯吉人也后稷之元妃也今公子蘭媯甥也天或啟之必將為君其後必蕃先納之可以亢寵與孔將鉏侯宣多納之盟於大宮而立之以與晉平穆公有疾曰蘭死吾其死乎吾所以生也刈蘭而卒四年楚人獻鼃於鄭靈公公子宋與子家將見子公之食指動以示子家曰他日我如此必嘗異味及入宰夫將解鼃相視而笑公問之子家以告及食大夫鼃召子公而弗與也子公怒染指於鼎



嘗之而出公怒欲殺子公子公與子家謀先子家曰畜  
老猶憚殺之而況君乎反譖子家子家懼而從之夏弑  
靈公書曰鄭公子歸生弑其君夷權不足也君子曰仁  
而不武無能達也凡弑君稱君君無道也稱臣臣之罪  
也鄭人立子良辭曰以賢則去疾不足以順則公子堅  
長乃立襄公襄公將去穆氏而舍子良子良不可曰穆  
氏宜存則固願也若將亡之則亦皆亡去疾何為乃舍  
之皆為大夫 十年鄭子家卒鄭人討幽公之亂斲子

家之棺而逐其族改葬幽公諡之曰靈 成公十年鄭  
公子班聞叔申之謀三月子如立公子繻夏四月鄭人  
殺繻立髡頑子如奔許 十三年六月丁卯夜鄭公子  
班自訾求入於大宮不能殺子印子羽反軍於市已  
子駟帥國人盟於大宮遂從而盡焚之殺子如子駟孫  
叔孫知 襄公二年秋七月鄭伯踰卒於是子罕當國  
子駟為政子國為司馬 五年夏鄭子國來聘通嗣君  
也 七年鄭僖公之為大子也於成之十六年與子罕

適晉不禮焉又與子豐適楚亦不禮焉及其元年朝於  
晉子豐欲愬諸晉而廢之子罕止之及將會於郟子駟  
相又不禮焉侍者諫不聽又諫殺之及郟子駟使賊夜  
弑僖公而以瘡疾赴於諸侯簡公生五年奉而立之  
八年鄭羣公子以僖公之死也謀子駟子駟先之夏四  
月庚辰辟殺子狐子熙子侯子丁孫擊孫惡出奔衛  
臣士竒曰鄭穆公出亡從晉文公伐鄭請弗與圍  
城之役篤念宗邦水木之誼至焉由是晉鄭感其

賢反而立之其視聚鷓冠與葬節下之羣公子異矣姬媧耦而必蕃國香刈而遂卒固有是理未可以機祥小數而疑左氏之夸也子公以染指之釁欲刺刃於君父子家知其不可則告於靈公執子公而戮之可也乃猶豫不忍畜老憚殺之言尤悖逆而不可為訓令子公反得搖舌其間以相劫制而遂即於大惡其剖棺戮尸舉累世之卿族而盡滅之有以也僖公之為太子也不禮於其臣及為

諸侯將會於鄙子駟相又侮慢之侍者諫而被殺  
固失優崇大臣之體矣然為人臣者可生可殺而  
不可使為亂禮貌一不至而冠警視之為之君者  
不亦難乎按僖公之為此行也棄楚而從晉也而  
子駟執官命未改之說於前此諸大夫請從晉之  
日則知公欲背楚非子駟意也及楚子囊伐鄭子  
駟子國子耳欲從楚子孔子矯子展欲待晉而子  
駟曰發言盈庭誰敢執其咎請從楚駢也受其咎

然則子駟固未嘗一日忘楚也僖公舍楚從晉身  
卒見弒此事勢相倚之必然者而豈盡不禮諸大  
夫之咎哉羣公子一謀子駟而反為所殺子駟討  
公子班之難而身為亂首與子家名在諸侯之策  
其亦不朽也夫

左傳紀事本末卷四十二

欽定四庫全書

左傳紀事本末卷四十三

詹事府詹事高士奇撰

鄭滅許

隱公十一年鄭伯伐許遂入許使許大夫百里奉許叔

以居許東偏

詳見鄭莊強國

桓公十五年許叔入於許成

公三年夏許恃楚而不事鄭鄭子良伐許四年冬十

一月鄭公孫申帥師疆許田許人敗諸展陂鄭伯伐許

取鉏任泠敦之田 五年夏許靈公愬鄭伯於楚 八年鄭伯將會晉師門於許東門大獲焉 十四年八月鄭子罕伐許敗焉 戊戌鄭伯復伐許庚子入其郛許人平以叔申之封 十五年許靈公畏偪於鄭請遷於楚 辛丑楚公子申遷許於葉 襄公十六年許男請遷於晉諸侯遂遷許許大夫不可晉人歸諸侯鄭子矯聞將伐許遂相鄭伯以從諸侯之師 二十六年許靈公如楚請伐鄭曰師不興孤不歸矣八月卒於楚楚子伐鄭



昭公十八年楚左尹王子勝言於楚子曰許於鄭讐敵也而居楚地以不禮於鄭晉鄭方睦鄭若伐許而晉助之楚喪地矣君盍遷許許不專於楚鄭方有令政許曰余舊國也鄭曰余俘邑也葉在楚國方城外之蔽也土不可易國不可小許不可俘讐不可啓君其圖之楚子說冬楚子使王子勝遷許於析實白羽 十九年夏許悼公瘞五月戊辰飲大子止之藥卒大子奔晉書曰弑其君君子曰盡心力以事君舍藥物可也 冬葬許

悼公

補公羊傳賊未討何以書葬不成於弒也曷為不成

於弒止進藥而藥殺也止進藥而藥殺則曷為加弒  
焉爾譏子道之不盡也

穀梁傳不弒而曰弒責止也止曰我與夫弒者不立  
乎其位以與其弟虺哭泣歆飭粥噎不容粒未踰年  
而死故君子即止自責而責之也

定公四年許遷於容城 六年春鄭滅許因楚敗也

臣士竒曰許為太岳之裔國於舊許與鄭為鄰而鄭之所欲吞併以拓其封竟者也當魯隱之季會齊魯以入許使許叔處許西偏僅存其祀耳及桓公時鄭方有內難許叔乘機竊入非鄭意也而許又南附於楚數從伐鄭於是世為仇讐云夫鄭許唇齒之國也使鄭能盡睦鄰之禮挾許以從中國許豈甘折而入於楚哉乃恃強陵弱惟滅許之是務既取鉏任泠敦之田又平以叔申之封彈丸者

許所餘有幾耶是以靈公兩訴於楚曰師不興孤  
不歸矣淚盡楚庭魂羈鄢郢慘惻至此其下喬而  
遷於幽谷也亦鄭之不善處許而為楚淵驅耳然  
許亦有失策焉當時許嘗請遷於晉夫遷晉愈於  
遷楚明甚而許大夫從中沮撓晉人歸諸侯其事  
遂寢乃即安於楚始而葉繼而白羽繼而容城流  
離困苦卒為鄭所滅而楚屬師徒撓敗不能救也  
許固不善擇音亦不能不深恨於鄭之相煎太急

也

左傳紀事本末卷四十三

欽定四庫全書

左傳紀事本末卷四十四

詹事府詹事高士奇撰

子產相鄭

西宮純門之難  
諸臣興廢附

襄公五年夏鄭子國來聘通嗣君也 八年鄭子國子

耳侵蔡獲蔡司馬公子燮鄭人皆喜惟子產不順曰小國無文德而有武功禍莫大焉楚人來討能勿從乎從之晉師必至晉楚伐鄭自今鄭國不四五年弗得寧矣

子國怒之曰爾何知國有大命而有正卿童子言焉將  
為戮矣 冬楚子囊伐鄭討其侵蔡也 十年楚子囊  
鄭子耳伐宋秋七月侵我西鄙還圍蕭八月丙寅克之  
九月侵宋北鄙孟獻子曰鄭其有災乎師競已甚周猶  
不堪競况鄭子有災其執政之三士乎 初子駟與尉  
止有爭將禦諸侯之師而黜其車尉止獲又與之爭子  
駟抑尉止曰爾車非禮也遂弗使獻初子駟為田洫司  
氏堵氏侯氏子師氏皆喪田焉故五族聚羣不逞之人



因公子之徒以作亂於是子駟當國子國為司馬子耳  
為司空子孔為司徒冬十月戊辰尉止司臣侯晉堵女  
父子師僕帥賊以入晨攻執政於西宮之朝殺子駟子  
國子耳劫鄭伯以如北宮子孔知之故不死書曰盜言  
無大夫焉子西聞盜不儆而出尸而追盜盜入於北宮  
乃歸授甲臣妾多逃器用多喪子產聞盜為門者庀羣  
司閉府庫慎閉藏完守備成列而後出兵車十七乘尸  
而攻盜於北宮子驍帥國人助之殺尉止子師僕盜衆

盡死侯晉奔晉堵女父司臣尉翩司齊奔宋子孔當國  
為載書以位序聽政辟大夫諸司門子弗順將誅之子  
產止之請為之焚書子孔不可曰為書以定國衆怒而  
焚之是衆為政也國不亦難乎子產曰衆怒難犯專欲  
難成合二難以安國危之道也不如焚書以安衆子得  
所欲衆亦得安不亦可乎專欲無成犯衆興禍子必從  
之乃焚書於倉門之外衆而後定 十五年鄭尉氏司  
氏之亂其餘盜在宋鄭人以子西伯有子產之故納賂

於宋以馬四十乘與師後師慧三月公孫黑為質馬司  
城子罕以堵女父尉翩司齊與之良司臣而逸之託諸  
季武子武子寘諸卞鄭人醢之三人也師慧過宋朝將  
私焉其相曰朝也慧曰無人焉相曰朝也何故無人慧  
曰必無人焉若猶有人豈其以千乘之相易淫樂之矇  
必無人焉故也子罕聞之固請而歸之 十二月鄭人  
奪堵狗之妻而歸諸范氏 十八年鄭子孔欲去諸大  
夫將叛晉而起楚師以去之使告子庚子庚弗許楚子

聞之使揚豚尹宜告子庚曰國人謂不穀主社稷而不  
出師死不從禮不穀即位於今五年師徒不出人其以  
不穀為自逸而忘先君之業矣大夫圖之其若之何子  
庚歎曰君王其謂午懷安乎吾以利社稷也見使者稽  
首而對曰諸侯方睦於晉臣請嘗之若可君而繼之不  
可收師而退可以無害君亦無辱子庚帥師治兵於汾  
於是子蟠伯有子張從鄭伯伐齊子孔子展子西守二  
子知子孔之謀完守入保子孔不敢會楚師楚師伐鄭

次於魚陵右師城上棘遂涉潁次於旃然蔦子馮公子  
格率銳師侵費滑胥靡獻於雍梁右回梅山侵鄭東北  
至於蟲牢而反子庚門於純門信於城下而還涉於魚  
菑之下甚雨及之楚師多凍役徒幾盡 十九年鄭子  
孔之為政也專國人患之乃討西宮之難與純門之師子  
孔當罪以其甲及子革子良氏之甲守甲辰子展子西  
率國人伐之殺子孔而分其室書曰鄭殺其大夫專也  
子然子孔宋子之子也士子孔圭媯之子也圭媯之班

亞宋子而相親也士子孔亦相親也僖之四年子然卒  
簡之元年士子孔卒司徒孔實相子革子良之室三室  
如一故及於難子革子良出奔楚子革為右尹鄭人使  
子展當國子西聽政立子產為卿 二十二年夏晉人  
徵朝於鄭鄭人使少正公孫僑對曰在晉先君悼公九  
年我寡君於是即位即位八月而我先大夫子駟從寡  
君以朝於執事執事不禮於寡君寡君懼因是行也我  
二年六月朝於楚晉是以有戲之役楚人猶競而申禮

於敝邑敝邑欲從執事而懼為大尤曰晉其謂我不共  
有禮是以不敢攜貳於楚我四年三月先大夫子嶠又  
從寡君以觀釁於楚晉於是乎有蕭魚之役謂我敝邑  
適在晉國譬諸草木吾臭味也而何敢差池楚亦不競  
寡君盡其土實重之以宗器以受齊盟遂帥羣臣隨於  
執事以會歲終貳於楚者子侯石孟歸而討之湟梁之  
明年子嶠老矣公孫夏從寡君以朝於君見於嘗酎與  
執燔焉間二年聞君將靖東夏四月又朝以聽事期不

朝之間無歲不聘無役不從以大國政令之無常國家  
罷病不虞荐至無日不惕豈敢忘職大國若安定之其  
朝夕在庭何辱命焉若不恤其患而以為口實其無乃  
不堪任命而翦為仇讐敝邑是懼其敢忘君命委諸執  
事執事實重圖之 九月鄭公孫黑肱有疾歸邑於公  
召室老宗人立段而使黜官薄祭祭以特羊殷以少牢  
足以共祀盡歸其餘邑曰吾聞之生於亂世貴而能貧  
民無求焉可以後亡敬其事君與二三子生在敬戒不



在富也已巳伯張卒君子曰善戒詩曰慎爾侯度用戒  
不虞鄭子張其有焉 十二月鄭游販將如晉未出竟  
遭逆妻者奪之以館於邑丁巳其夫攻子明殺之以其  
妻行子展廢良而立太叔曰國卿君之貳也民之主也  
不可以苟請舍子明之類求亡妻者使復其所使游氏  
勿怨曰無昭惡也 二十四年范宣子為政諸侯之幣  
重鄭人病之二月鄭伯如晉子產寓書於子西以告宣  
子曰子為晉國四鄰諸侯不聞令德而聞重幣僞也惑

之僑聞君子長國家者非無賄之患而無令名之難夫  
諸侯之賄聚於公室則諸侯貳若吾子賴之則晉國貳  
諸侯貳則晉國壞晉國貳則子之家壞何沒沒也將焉  
用賄夫令名德之輿也德國家之基也有基無壞無亦  
是務乎有德則樂樂則能久詩云樂只君子邦家之基  
有令德也夫上帝臨汝無貳爾心有令名也夫恕思以  
明德則令名載而行之是以遠至邇安毋寧使人謂子  
子實生我而謂子浚我以生子象有齒以焚其身賄也

宣子說乃輕幣是行也鄭伯朝晉為重幣故且請伐陳也鄭伯稽首宣子辭子西相曰以陳國之介恃大國而陵虐於敝邑寡君是以請罪焉敢不稽首 晉侯嬖程鄭使佐下軍鄭行人公孫揮如晉聘程鄭問焉曰敢問降階何由子羽不能對歸以語然明然明曰是將死矣不然將亡貴而知懼懼而思降乃得其階下人而已又何問焉且夫既登而求降階者知人也不在程鄭其有亡釁乎不然其有感疾將死而憂也 二十五年初陳

侯會楚子伐鄭當陳隧者井堙木刊鄭人怨之六月鄭子展子產帥車七百乘伐陳宵突陳城遂入之陳侯扶其大子偃師奔墓遇司馬桓子曰載余曰將巡城遇賈獲載其母妻下之而授公車公曰舍而母辭曰不祥與其妻扶其母以奔墓亦免子展命師無入公宮與子產親御諸門陳侯使司馬桓子賂以宗器陳侯免擁社使其衆男女別而纍以待於朝子展執紼而見再拜稽首承飲而進獻子美入數俘而出祝祓社司徒致民司馬

致節司空致地乃還 鄭子產獻捷於晉戎服將事晉  
人問陳之罪對曰昔虞闕父為周陶正以服事我先王  
我先王賴其利器用也與其神明之後也庸以元女大  
姬配胡公而封諸陳以備三恪則我周之自出至於今  
是賴桓公之亂蔡人欲立其出我先君莊公奉五父而  
立之蔡人殺之我又與蔡人奉戴厲公至於莊宣皆我  
之自立夏氏之亂成公播蕩又我之自入君所知也今  
陳忘周之大德蔑我大惠棄我姻親介恃楚衆以馮陵

我敝邑不可億逞我是以有往年之告未獲成命則有  
我東門之役當陳隧者井堙木刈敝邑大懼不競而恥  
大姬天誘其衷啟敝邑心陳知其罪授手於我用敢獻  
功晉人曰何故侵小對曰先王之命唯罪所在各致其  
辟且昔天子之地一圻列國一同自是以衰今大國多  
數圻矣若無侵小何以至焉晉人曰何故戎服對曰我  
先君武莊為平桓卿士城濮之役文公布命曰各復舊  
職命我文公戎服輔王以授楚捷不敢廢王命故也士

莊伯不能詰復於趙文子文子曰其辭順犯順不祥乃受之冬十月子展相鄭伯如晉拜陳之功子西復伐陳陳及鄭平仲尼曰志有之言以足志文以足言不言誰知其志言之無文行而不遠晉為伯鄭入陳非文辭不為功慎辭哉 晉程鄭卒子產始知然明問為政馬對曰視民如子見不仁者誅之如鷹鷂之逐鳥雀也子產喜以語子大叔且曰他日吾見蔑之面而已今吾見其心矣子大叔問政於子產子產曰政如農功日夜思之

思其始而成其終朝夕而行之行無越思如農之有畔  
其過鮮矣 二十六年鄭伯賞入陳之功三月甲寅朔  
享子展賜之先路三命之服先八邑賜子產次路再命  
之服先六邑子產辭邑曰自上以下隆殺以兩禮也臣  
之位有四且子展之功也臣不敢及賞禮請辭邑公固  
予之乃受三邑公孫揮曰子產其將知政矣讓不失禮  
秋七月齊侯鄭伯為衛侯故如晉國景子相齊侯子  
展相鄭伯叔向曰鄭七穆罕氏其後亡者也子展儉而



壹 鄭伯歸自晉使子西如晉聘辭曰寡君來煩執事  
懼不免於戾使夏謝不敏君子曰善事大國 楚子伐  
鄭鄭人將禦之子產曰晉楚將平諸侯將和楚王是故  
昧於一來不如使逞而歸乃易成也子展說不禦寇  
二十七年秋鄭伯享趙孟於垂隴子展伯有子西子產  
子大叔二子石從趙孟曰七子從君以寵武也請皆賦  
以卒君貺武亦以觀七子之志子展賦草蟲趙孟曰善  
哉民之主也抑武也不足以當之伯有賦鶉之賁賁趙

孟曰林第之言不踰闕况在野乎非使人之所得聞也  
子西賦黍苗之四章趙孟曰寡君在武何能焉子產賦  
隰桑趙孟曰武請受其卒章子大叔賦野有蔓草趙孟  
曰吾子之惠也印段賦蟋蟀趙孟曰善哉保家之主也  
吾有望矣公孫段賦桑扈趙孟曰匪交匪敖福將焉往  
若保是言也欲辭福祿得乎卒享文子告叔向曰伯有  
將為戮矣詩以言志志誣其上而公怨之以為賓榮其  
能久乎幸而後亡叔向曰然已侈所謂不及五稔者夫

子之謂矣文子曰其餘皆數世之主也子展其後亡者  
也在上不忘降印氏其次也樂而不荒樂以安民不淫  
以使之後亡不亦可乎 二十八年蔡侯歸自晉入於  
鄭鄭伯享之不敬子產曰蔡侯其不免乎日其過此也  
君使子展廷勞於東門之外而傲吾曰猶將更之今還  
受享而惰乃其心也君小國事大國而惰傲以為己心  
將得死乎若不免必由其子其為君也淫而不父僑聞  
之如是者恒有子禍 子產相鄭伯以如楚舍不為壇

外僕言曰昔先大夫相先君適四國未嘗不為壇自是至今亦皆循之今子草舍無乃不可乎子產曰大適小則為壇小適大苟舍而已焉用壇僑聞之大適小有五美宥其罪戾赦其過失救其菑患賞其德刑教其不及小國不困懷服如歸是故作壇以昭其功宣告後人無怠於德小適大有五惡說其罪戾請其不足行其政事共其職貢從其時命不然則重其幣帛以賀其福而弔其凶皆小國之禍也焉用作壇以昭其禍所以告子孫

無昭禍焉可也 公如楚過鄭鄭伯不在伯有廷勞於  
黃崖不敬穆叔曰伯有無戾於鄭鄭必有大咎敬民之  
主也而棄之何以承守鄭人不討必受其辜濟澤之阿  
行潦之蘋藻寘諸宗室季蘭尸之敬也敬可棄乎 二  
十九年葬靈王鄭上卿有事子展使印段往伯有曰弱  
不可子展曰與其莫往弱不猶愈乎詩云王事靡盬不  
遑啟處東西南北誰敢寧處堅事晉楚以蕃王室也王  
事無曠何常之有遂使印段如周 鄭子展卒子皮即

位於是鄭饑而未及麥民病子皮以子展之命餽國人粟戶一鍾是以得鄭國之民故罕氏常掌國政以為上卿鄭伯有使公孫黑如楚辭曰楚鄭方惡而使余往是殺余也伯有曰世行也子皙曰可則往難則已何世之有伯有將強使之子皙怒將伐伯有氏大夫和之十二月己巳鄭大夫盟於伯有氏禚諶曰是盟也其與幾何詩曰君子屢盟亂是用長今是長亂之道也禍未歇也必三年而後能紓然明曰政將焉往禚諶曰善之代不善

天命也其焉辟子產舉不踰等則位班也擇善而舉則世隆也天又除之奪伯有魄子西即世將焉辟之天禍鄭久矣其必使子產息之乃猶可以戾不然將亡矣

三十年子產相鄭伯以如晉叔向問鄭國之政焉對曰吾得見與否在此歲也駟良方爭未知所成若有所成吾得見乃可知也叔向曰不既和矣乎對曰伯有侈而愎子皙好在人上莫能相下也雖其和也猶相積惡也惡至無日矣夏四月己亥鄭伯及其大夫盟君子是

以知鄭難之不已也 鄭伯有者酒為窟室而夜飲酒  
擊鐘馬朝至未已朝者曰公馬在其人曰吾公在壑谷  
皆自朝布路而罷既而朝則又將使子皙如楚歸而飲  
酒庚子子皙以駟氏之甲伐而焚之伯有奔雍梁醒而  
後知之遂奔許大夫聚謀子皮曰仲虺之志云亂者取  
之亡者侮之推亡固存國之利也罕駟豐同生伯有汰  
侈故不免人謂子產就直助彊子產曰豈為我徒國之  
禍難誰知所蔽或主彊直難乃不生姑成吾所辛丑子



產斂伯有氏之死者而殯之不及謀而遂行印段從之  
子皮止之衆曰人不我順何止焉子皮曰夫子禮於死  
者况生者乎遂自止之壬寅子產入癸卯子石入皆受  
盟於子皙氏乙巳鄭伯及其大夫盟於大宮盟國人於  
師之梁之外伯有聞鄭人之盟已也怒聞子皮之甲不  
與攻已也喜曰子皮與我矣癸丑晨自墓門之瀆入因  
馬師頡介於襄庫以伐舊北門駟帶率國人以伐之皆  
召子產子產曰兄弟而及此吾從天所與伯有死於羊

肆子產襚之枕之股而哭之斂而殯諸伯有之臣在市側者既而葬諸斗城子駟氏欲攻子產子皮怒之曰禮國之幹也殺有禮禍莫大焉乃止於是游吉如晉還聞難不入復命於介八月甲子奔晉駟帶追之及酸棗與子上盟用兩珪質於河使公孫肸入盟大夫已已復歸書曰鄭人殺良霄不稱大夫言自外入也於子驕之卒也將葬公孫揮與裨竈晨會事焉過伯有氏其門上生莠子羽曰其莠猶在乎於是歲在降婁降婁中而且裨

竈指之曰猶可以終歲歲不及此次也已及其亡也歲  
在嫩訾之口其明年乃及降婁僕展從伯有與之皆死  
羽頡出奔晉為任大夫雞澤之會鄭樂成奔楚遂適晉  
羽頡因之與之比而事趙文子言伐鄭之說焉以宋之  
盟故不可子皮以公孫鉏為馬師 鄭子皮授子產政  
辭曰國小而偏族大寵多不可為也子皮曰虎帥以聽  
誰敢犯子子善相之國無小小能事大國乃寬子產為  
政有事伯石賂與之邑子大叔曰國皆其國也奚獨賂

馬子產曰無欲實難皆得其欲以從其事而要其成非  
我有成其在人乎何愛於邑邑將焉往子大叔曰若四  
國何子產曰非相違也而相從也四國何尤焉鄭書有  
之曰安定國家必大焉先姑先安大以待其所歸既伯  
石懼而歸邑卒與之伯有既死使大史命伯石為卿辭  
太史退則請命焉復命之又辭如是三乃受策入拜子  
產是以惡其為人也使次已位子產使都鄙有章上下  
有服田有封洫廬井有伍大人之忠儉者從而與之泰

侈者因而斃之豐卷將祭請田焉弗許曰唯君用鮮衆  
給而已子張怒退而徵役子產奔晉子皮止之而逐豐  
卷豐卷奔晉子產請其田里三年而復之反其田里及  
其入焉從政一年與人誦之曰取我衣冠而褚之取我  
田疇而伍之孰殺子產吾其與之及三年又誦之曰我  
有子弟子產誨之我有田疇子產殖之子產而死誰其  
嗣之 三十一年公薨之月子產相鄭伯以如晉晉侯  
以我喪故未之見也子產使盡壞其館之垣而納車馬

馬士文伯讓之曰敝邑以政刑之不修冠盜充斥無若諸侯之屬辱在寡君者何是以令吏人完客所館高其閭閻厚其墻垣以無憂客使今吾子壞之雖從者能戒其若異客何以敝邑之為盟主繕完葺牆以待賓客若皆毀之其何以共命寡君使匄請命對曰以敝邑褊小介於大國誅求無時是以不敢寧居悉索敝賦以來會時事逢執事之不間而未得見又不獲聞命未知見時不敢輸幣亦不敢暴露其輸之則君之府實也非薦陳

之不敢輸也其暴露之則恐燥濕之不時而朽蠹以重  
敝邑之罪僑聞文公之為盟主也宮室卑庠無觀臺榭  
以崇大諸侯之館館如公寢庫廡繕修司空以時平易  
道路巧人以時填館宮室諸侯賓至甸設庭燎僕人巡  
宮車馬有所賓從有代中車脂轄隸人牧圉各瞻其事  
百官之屬各展其物公不留賓而亦無廢事憂樂同之  
事則巡之教其不知而恤其不足賓至如歸無寧菑患  
不畏寇盜而亦不患燥濕今銅鞮之宮數里而諸侯舍

於隸人門不容車而不可踰越盜賊公行而天廩不戒  
實見無時命不可知若又勿壞是無所藏幣以重罪也  
敢請執事將何所命之雖君之有魯喪亦敝邑之憂也  
若獲薦幣修垣而行君之惠也敢憚勤勞文伯復命趙  
文子曰信我實不德而以隸人之垣以羸諸侯是吾罪  
也使士文伯謝不敏焉晉侯見鄭伯有加禮厚其宴好  
而歸之乃築諸侯之館叔向曰辭之不可以已也如是  
夫子產有辭諸侯賴之若之何其釋辭也詩曰辭之輯



矣民之協矣辭之繹矣民之莫矣其知之矣鄭子皮使  
印段如楚以適晉告禮也 十二月北宮文子相衛襄  
公以如楚宋之盟故也過鄭印段廷勞於棊林如聘禮  
而以勞辭文子入聘子羽為行人馮簡子與大叔逆客  
事畢而出言於衛侯曰鄭有禮其數世之福也其無大  
國之討乎詩云誰能執熱逝不以濯禮之於政如熱之  
有濯也濯以救熱何患之有子產之從政也擇能而使  
之馮簡子能斷大事子大叔美秀而文公孫揮能知四

國之為而辨於其大夫之族姓班位貴賤能否而又善為辭令裨諶能謀謀於野則獲謀於邑則否鄭國將有諸侯之事子產乃問四國之為於子羽且使多為辭令與裨諶乘以適野使謀可否而告馮簡子使斷之事成乃授子大叔使行之以應對賓客是以鮮有敗事北宮文子所謂有禮也鄭人遊於鄉校以論執政然明謂子產曰毀鄉校如何子產曰何為夫人朝夕退而游焉以議執政之善否其所善者吾則行之其所惡者吾則

改之是吾師也若之何毀之我聞忠善以損怨不聞作  
威以防怨豈不遽止然猶防川大決所犯傷人必多吾  
不克救也不如小決使道不如吾聞而樂之也然明曰  
蔑也今而後知吾子之信可事也小人實不才若果行  
此其鄭國實賴之豈唯二三臣仲尼聞是語也曰以是  
觀之人謂子產不仁吾不信也 子皮欲使尹何為邑  
子產曰少未知可否子皮曰愿吾愛之不吾叛也使夫  
往而學焉夫亦愈知治矣子產曰不可人之愛人求利

之也今吾子愛人則以政猶未能操刀而使割也其傷實多子之愛人傷之而已其誰敢求愛於子子於鄭國棟也棟折榱崩僞將厭焉敢不盡言子有美錦不使人學製焉大官大邑身之所庇也而使學者製焉其為美錦不亦多乎僞聞學而後入政未聞以政學者也若果行此必有所害譬如田獵射御貫則能獲禽若未嘗登車射御則敗績厭覆是懼何暇思獲子皮曰善哉虎不敏吾聞君子務知大者遠者小人務知小者近者我小

人也衣服附在吾身我知而慎之大官大邑所以庇身也我遠而慢之微子之言吾不知也他日我曰子為鄭國我為吾家以庇焉其可也今而後知不足自今請雖吾家聽子而行子產曰人心之不同如其面焉吾豈敢謂子面如吾面乎抑心所謂危亦以告也子皮以為忠故委政焉子產是以能為鄭國

補逸 呂氏春秋晉人欲攻鄭令叔嚮聘焉視其有人與

無人子產為之詩曰子惠思我褰裳涉洧子不思我

豈無他士叔嚮歸曰鄭有人子產在焉不可攻也秦荆  
近其詩有異心不可攻也晉人乃輟攻鄭孔子曰詩  
云無競惟人子產一稱而鄭國免

韓非子鄭子產晨出過東匠之間聞婦人之哭也撫其  
御之手而聽之有間遣吏執而問之則手絞其夫者  
也異日其御問曰夫子何以知之子產曰其聲懼凡  
人於其親愛也始病而憂臨死而懼已死而哀今哭  
已死不哀而懼是以知其有姦也

家語子游問於孔子曰夫子之極言子產之惠也可  
得聞乎孔子曰惠在愛民而已矣子游曰愛民謂之  
德教何翅施惠哉孔子曰夫子產者猶衆人之母也  
能食之弗能教也子游曰其事可言乎孔子曰子產  
以所乘之輿濟冬涉者是愛教也

昭公元年楚公子圍聘於鄭且娶於公孫段氏伍舉為  
介將入館鄭人惡之使行人子羽與之言乃館於外既  
聘將以衆逆子產患之使子羽辭曰以敝邑褊小不足

以容從者請墀聽命令尹命大宰伯州犁對曰君辱貺寡大夫圍謂圍將使豐氏撫有而室圍布几筵告於莊共之廟而來若野賜之是委君貺於草莽也是寡大夫不得列於諸卿也不寧唯是又使圍蒙其先君將不得為寡君老其蔑以復矣唯大夫圖之子羽曰小國無罪恃實其罪將恃大國之安靖已而無乃包藏禍心以圖之小國失恃而懲諸侯使莫不憾者距違君命而有所壅塞不行是懼不然敝邑館人之屬也其敢愛豐氏之



裒伍舉知其有備也請垂橐而入許之正月乙未入逆  
而出鄭徐吾犯之妹美公孫楚聘之矣公孫黑又使  
強委禽焉犯懼告子產子產曰是國無政非子之患也  
惟所欲與犯請於二子請使女擇焉皆許之子皙盛飾  
入布幣而出子南戎服入左右射超乘而出女自房觀  
之曰子皙信美矣抑子南夫也夫夫婦婦所謂順也適  
子南氏子皙怒既而橐甲以見子南欲殺之而取其妻  
子南知之執戈逐之及衝擊之以戈子皙傷而歸告大

夫曰我好見之不知其有異志也故傷大夫皆謀之子  
產曰直鈞幼賤有罪罪在楚也乃執子南而數之曰國  
之大節有五女皆奸之畏君之威聽其政尊其貴事其  
長養其親五者所以為國也今君在國女用兵焉不畏  
威也奸國之紀不聽政也子皙上大夫女嬖大夫而弗  
下之不尊貴也幼而不忌不事長也兵其從兄不養親  
也君曰余不女忍殺宥女以遠勉速行乎無重而罪五  
月庚辰鄭放游楚於吳將行子南子產咨於大叔大叔

曰吉不能亢身馬能亢宗彼國政也非私難也子圖鄭國利則行之又何疑焉周公殺管叔而蔡蔡叔夫豈不愛王室故也吉若獲戾子將行之何有於諸游 鄭為游楚亂故六月丁巳鄭伯及其大夫盟於公孫段氏罕虎公孫僑公孫段印段游吉駟帶私盟於閨門之外實薰隧公孫黑彊與於盟使大史書其名且曰七子子產弗討 二年秋鄭公孫黑將作亂欲去游氏而代其位傷疾作而不果駟氏與諸大夫欲殺之子產在鄙聞之

懼弗及乘遽而至使吏數之曰伯有之亂以大國之事而未爾討也爾有亂心無厭國不女堪專伐伯有而罪一也昆弟爭室而罪二也薰隧之盟女矯君位而罪三也有死罪三何以堪之不速死大刑將至再拜稽首辭曰死在朝夕無助天為虐子產曰人誰不死凶人不終命也作凶事為凶人不助天其助凶人乎請以印為褚師子產曰印也若才君將任之不才將朝夕從女女罪之不恤而又何請焉不速死司寇將至七月壬寅縊尸

諸周氏之衢加木焉 四年鄭子產作丘賦國人謗之  
曰其父死於路已為蠆尾以令於國國將若之何子寬  
以告子產曰何害苟利社稷死生以之且吾聞為善者  
不改其度故能有濟也民不可逞度不可改詩曰禮義  
不愆何恤於人言吾不遷矣渾罕曰國氏其先亡乎君  
子作法於涼其敝猶貪作法於貪敝將若之何姬在列  
者蔡及曹滕其先亡乎偪而無禮鄭先衛亡偪而無法  
政不率法而制於心民各有心何上之有 五年鄭罕

虎如齊娶於子尾氏晏子驟見之陳桓子問其故對曰  
能用善人民之主也 六年三月鄭人鑄刑書叔向使  
詔子產書曰始吾有虞於子今則已矣昔先王議事以制  
不為刑辟懼民之有爭心也猶不可禁禦是故閑之以  
義糾之以政行之以禮守之以信奉之以仁制為祿位  
以勸其從嚴斷刑罰以威其淫懼其未也故誨之以忠  
聳之以行教之以務使之以和臨之以敬涖之以彊斷  
之以剛猶求聖哲之上明察之官忠信之長慈惠之師

民於是乎可任使也而不生禍亂民知有辟則不忌於上並有爭心以徵於書而徵幸以成之弗可為矣夏有亂政而作禹刑商有亂政而作湯刑周有亂政而作九刑三辟之興皆叔世也今吾子相鄭國作封洫立謗政制參辟鑄刑書將以靖民不亦難乎詩云儀式刑文王之德日靖四方又曰儀刑文王萬邦作孚如是何辟之有民知爭端矣將棄禮而徵於書錐刀之末將盡爭之亂獄滋豐賄賂並行終子之世鄭其敗乎胥聞之國將

亡必多制其此之謂乎復書曰若吾子之言僑不才不能及子孫吾以救世也既不承命敢忘大惠士文伯曰火見鄭其火乎火未出而作火以鑄刑器歲爭辟焉火如象之不火何為六月丙戌鄭災 七年鄭子產聘於晉晉侯有疾韓宣子逆客私焉曰寡君寢疾於今三月矣並走羣望有加而無瘳今夢黃熊入於寢門其何厲鬼也對曰以君之明子為大政其何厲之有昔堯殛鯀鯀於羽山其神化為黃熊以入於羽淵實為夏郊三代祀



之晉為盟主其或者未之祀也乎韓子祀夏郊晉侯有  
間賜子產莒之二方鼎鄭人相驚以伯有曰伯有至  
矣則皆走不知所往鑄刑書之歲二月或夢伯有介而  
行曰壬子余將殺帶也明年壬寅余又將殺段也及壬  
子駟帶卒國人益懼齊燕平之月壬寅公孫段卒國人  
愈懼其明月子產立公孫洩及良止以撫之乃止子大  
叔問其故子產曰鬼有所歸乃不為厲吾為之歸也大  
叔曰公孫洩何為子產曰說也為身無義而圖說從政

有所反之以取媚也不媚不信不信民不從也及子產適晉趙景子問焉曰伯有猶能為鬼乎子產曰能人生始化曰魄既生魄陽曰魂用物精多則魂魄彊是以有精爽至於神明匹夫匹婦彊死其魂魄猶能馮依於人以為淫厲况良霄我先君穆公之冑子良之孫子耳之子敝邑之卿從政三世矣鄭雖無腆抑諺曰蕞爾國而三世執其政柄其用物也弘矣其取精也多矣其族又大所馮厚矣而彊死能為鬼不亦宜乎子皮之族飲

酒無度故馬師氏與子皮氏有惡齊師還自燕之月罕  
朔殺罕黜罕朔奔晉韓宣子問其位於子產子產曰君  
之羈臣苟得容以逃死何位之敢擇卿違從大夫之位  
罪人以其罪降古之制也朔於敝邑亞大夫也其官馬  
師也獲戾而逃唯執政所寘之得免其死為惠大矣又  
敢求位宣子為子產之敏也使從嬖大夫 十年秋七  
月戊子晉平公卒九月叔孫婁齊國弱宋華定衛北宮  
喜鄭罕虎許人曹人莒人邾人滕人杞人小邾人

如晉葬平公也鄭子皮將以幣行子產曰喪馬用幣用幣必百兩百兩必千人千人至將不行不行必盡用之幾千人而國不亡既葬諸侯之大夫欲因見新君叔向辭之子皮盡用其幣歸謂子羽曰非知之實難將在行之夫子知之矣我則不足書曰欲敗度縱敗禮我之謂矣夫子知度與禮矣我實縱欲而不能自克也 十二年三月鄭簡公卒將為葬除及游氏之廟將毀焉子大叔使其除徒執用以立而無庸毀曰子產過女而問何

故不毀乃曰不忍廟也諾將毀矣既如是子產乃使辟之司墓之室有當道者毀之則朝而塋弗毀則日中而塋子大叔請毀之曰無若諸侯之賓何子產曰諸侯之賓能來會吾喪豈憚日中無損於賓而民不害何故不為遂弗毀日中而葬君子謂子產於是乎知禮禮無毀人以自成也 六月葬鄭簡公 十三年晉合諸侯於平丘子產大叔相鄭伯以如會子產以幄幕九張行子大叔以四十既而悔之每舍損焉及會亦如之 及盟

子產爭承曰鄭伯男也而從諸侯之貢懼弗給也自日  
中以爭至於昏晉人許之 子產歸未至聞子皮卒哭  
且曰吾已無為為善矣惟夫子知我仲尼謂子產於是  
行也足以為國基矣詩曰樂只君子邦家之基子產君  
子之求樂者也且曰合諸侯藝貢事禮也 十六年三  
月晉韓起聘於鄭鄭伯享之子產戒曰苟有位於朝無  
有不共恪孔張後至立於客間執政禦之適客後又禦  
之適縣間客從而笑之事畢富子諫曰夫大國之人不

可不慎也幾為之笑而不陵我我皆有禮夫猶鄙我國而無禮何以求榮孔張失位吾子之恥也子產怒曰發命之不衷出令之不信刑之頗類獄之放紛會朝之不敬使命之不聽取陵於大國罷民而無功罪及而弗知僞之恥也孔張君之昆孫子孔之後也執政之嗣也為嗣大夫承命以使周於諸侯國人所尊諸侯所知立於朝而祀於家有祿於國有賦於軍喪祭有職受服歸服其祭在廟已有著位在位數世世守其業而忘其所僞

焉得恥之辟邪之人而皆及執政是先王無刑罰也子  
寧以他規我 宣子有環其一在鄭商宣子謁諸鄭伯  
子產弗與曰非官府之守器也寡君不知子大叔子羽  
謂子產曰韓子亦無幾求晉國亦未可以貳晉國韓子  
不可偷也若屬有讒人交鬪其間鬼神而助之以興其  
凶怒悔之何及吾子何愛於一環其以取憎於大國也  
盍求而與之子產曰吾非偷晉而有二心將終事之是  
以弗與忠信故也僞聞君子非無賄之難立而無令名



之患僞聞為國非不能事大字小之難無禮以定其位  
之患夫大國之人令於小國而皆獲其求將何以給之  
一其一否為罪滋大大國之求無禮以斥之何饜之有  
吾且為鄙邑則失位矣若韓子奉命以使而求玉焉貪  
淫甚矣獨非罪乎出一玉以起二罪吾又失位韓子成  
貪將焉用之且吾以玉賈罪不亦銳乎韓子買諸賈人  
既成賈矣商人曰必告君大夫韓子請諸子產曰日起  
請夫環執政弗義弗敢復也今買諸商人商人曰必以

聞敢以為請子產曰昔我先君桓公與商人皆出自周庸次比耦以艾殺此地斬之蓬蒿藜藿而共處之世有盟誓以相信也曰爾無我叛我無強賈毋或勾奪爾有利市實賄我勿與知恃此質誓故能相保以至於今今吾子以好來辱而謂敝邑強奪商人是教敝邑背盟誓也毋乃不可乎吾子得玉而失諸侯必不為也若大國令而共無藝鄭鄙邑也亦勿為也僑若獻玉不知所成敢私布之韓子辭玉曰起不敏敢求玉以徼二罪敢辭

之 夏四月鄭六卿餞宣子於郊宣子曰二三君子請  
皆賦起亦以知鄭志子蠶賦野有蔓草宣子曰孺子善  
哉吾有望矣子產賦鄭之羔裘宣子曰起不堪也子大  
叔賦褰裳宣子曰起在此敢勤子至於他人乎子大叔  
拜宣子曰善哉子之言是不有是事其能終乎子游賦  
風雨子旗賦有女同車子柳賦籜兮宣子喜曰鄭其庶  
乎二三君子以君命貺起賦不出鄭志皆昵燕好也二  
三君子數世之主也可以無懼矣宣子皆獻馬馬而賦

我將子產拜使五卿皆拜曰吾子靖亂敢不拜德宣子  
私覲於子產以玉與馬曰子命起舍夫玉是賜我玉而  
免吾死也敢不藉手以拜 鄭大旱使屠擊祝款豎柎  
有事於桑山斬其木不雨子產曰有事於山斲山林也  
而斬其木其罪大矣奪之官邑 十七年冬有星孛於  
大辰西及漢申須曰彗所以除舊布新也天事恒象今  
除於火火出必布焉諸侯其有火災乎梓慎曰往年吾  
見之是其徵也火出而見今茲火出而章必火入而伏

其居火也久矣其與不然乎火出於夏為三月於商為四月於周為五月夏數得天若火作其四國當之在宋衛陳鄭乎宋大辰之虛也陳大皞之虛也鄭祝融之虛也皆火房也星孛及漢漢水祥也衛顛頊之虛也故燕帝丘其星為大水水火之牡也其以丙子若壬午作乎水火所以合也若火入而伏必以壬午不過其見之月鄭裨竈言於子產曰宋衛陳鄭將同日火若我用瓘斝玉瓚鄭必不火子產弗與 十八年夏五月火始昏見

丙子風梓慎曰是謂融風火之始也七日其火作乎戊寅風甚壬午大甚宋衛陳鄭皆火梓慎登大庭氏之庫以望之曰宋衛陳鄭也數日皆來告火裨竈曰不用吾言鄭又將火鄭人請用之子產不可子大叔曰寶以保民也若有火國幾亡可以救亡子何愛焉子產曰天道遠人道邇非所及也何以知之竈焉知天道是亦多言矣豈不或信遂不與亦不復火鄭之未災也里析告子產曰將有大祥民震動國幾亡吾身泯焉弗良及也國

遷其可乎子產曰雖可吾不足以定遷矣及火里析死  
矣未葬子產使輿三十人遷其柩火作子產辭晉公子  
公孫於東門使司寇出新客禁舊客勿出於宮使子寬  
子上巡羣屏攝至於大宮使公孫登徙大龜使祝史徙  
主柩於周廟告於先君使府人庫人各徹其事商成公  
徹司宮出舊宮人寘諸火所不及司馬司寇列居火道  
行火所焮城下之人伍列登城明日使野司寇各保其  
徵郊人助祝史除於國北禳火於玄冥回祿祈於四鄰

書焚室而寬其征與之材三日哭國不市使行人告於諸侯宋衛皆如是陳不救火許不弔災君子是以知陳許之先亡也 七月鄭子產為火故大為社祓禳於四方振除火災禮也乃簡兵大蒐將為蒐除子大叔之廟在道南其寢在道北其庭小過期三日使除徒陳於道南廟北曰子產過汝而命速除乃毀於而鄉子產朝過而怒之除者南毀子產及衝使從者止之曰毀於北方火之作也子產授兵登陴子大叔曰晉無乃討乎子產



曰吾聞之小國忘守則危况有災乎國之不可小有備  
故也既晉之邊吏讓鄭曰鄭國有災晉君大夫不敢寧  
居卜筮走望不愛牲玉鄭之有災寡君之憂也今執事  
擱然授兵登陴將以誰罪邊人恐懼不敢不告子產對  
曰若吾子之言敝邑之災君之憂也敝邑失政天降之  
災又懼讒慝之間謀之以啓貪人荐為敝邑不利以重  
君之憂幸而不亡猶可說也不幸而亡君雖憂之亦無  
及也鄭有他竟望走在晉既事晉矣其敢有二心 十

九年是歲也鄭駟偃卒子游娶於晉大夫生絲弱其父兄立子瑕子產憎其為人也且以為不順弗許亦弗止駟氏聳他日絲以告其舅冬晉人使以幣如鄭問駟乞之立故駟氏懼駟乞欲逃子產弗遣請龜以卜亦弗予大夫謀對子產不待而對客曰鄭國不天寡君之二三臣札瘥天昏今又喪我先大夫偃其子幼弱其一二父兄懼隊宗主私族於謀而立長親寡君與其二三老曰抑天實剝亂是吾何知焉諺曰無過亂門民有兵亂猶

憚過之而况敢知天之所亂今大夫將問其故抑寡君實不敢知其誰實知之平丘之會君尋舊盟曰無或失職若寡君之二三臣其即世者晉大夫而專制其位是晉之縣鄙也何國之為辭客幣而報其使晉人舍之

鄭大水龍鬪於時門之外洧淵國人請為禱焉子產弗許曰我鬪龍不我覲也龍鬪我獨何覲焉禳之則彼其室也吾無求於龍龍亦無求於我乃止也 二十年鄭子產有疾謂子大叔曰我死子必為政惟有德者能以

寬服民其次莫如猛夫火烈民望而畏之故鮮死焉水  
懦弱民狎而玩之則多死焉故寬難疾數月而卒大叔  
為政不忍猛而寬鄭國多盜取人於萑苻之澤大叔悔  
之曰吾早從夫子不及此興徒兵以攻萑苻之盜盡殺  
之盜少止仲尼曰善哉政寬則民慢慢則糾之以猛猛  
則民殘殘則施之以寬寬以濟猛猛以濟寬政是以和  
詩曰民亦勞止汙可小康惠此中國以綏四方施之以  
寬也毋從詭隨以謹無良式遏寇虐慘不畏明糾之以

猛也柔遠能邇以定我王平之以和也又曰不競不綌  
不剛不柔布政優優百祿是道和之至也及子產卒仲  
尼聞之出涕曰古之遺愛也

補史

記鄭相子產卒鄭人皆哭泣悲之如亡親戚子

產者鄭成公少子也為人仁愛人事君忠厚孔子嘗  
過鄭與子產如兄弟云及聞子產死孔子為泣曰古  
之遺愛也 鄭昭君之時以所愛徐摯為相國亂上  
下不親父子不和大宮子期言之君以子產為相為

相一年豎子不戲狎班白不提挈僮子不犁畔二年  
市不豫賈三年門不夜闔道不拾遺四年田器不歸  
五年士無尺籍喪期不令而治治鄭二十六年而死  
丁壯號哭老人兒啼曰子產去我死乎民將安歸

二十五年會於黃父謀王室也子大叔見趙簡子簡子  
問揖讓周旋之禮焉對曰是儀也非禮也簡子曰敢問  
何謂禮對曰吉也聞諸先大夫子產曰夫禮天之經也  
地之義也民之行也天地之經而民實則之則天之明

因地之性生其六氣用其五行氣為五味發為五色章  
為五聲淫則昏亂民失其性是故為禮以奉之為六畜  
五牲三犧以奉五味為九文六采五章以奉五色為九  
歌八風七音六律以奉五聲為君臣上下以則地義為  
夫婦外內以經二物為父子兄弟姊妹甥舅昏媾姻亞  
以象天明為政事庸力行務以從四時為刑罰威獄使  
民畏忌以類其震曜殺戮為溫慈惠和以效天之生殖  
長育民有好惡喜怒哀樂生於六氣是故審則宜類以

制六志哀有哭泣樂有歌舞喜有施舍怒有戰鬪喜生  
於好怒生於惡是故審行信令禍福賞罰以制死生生  
好物也死惡物也好物樂也惡物哀也哀樂不失乃能  
協於天地之性是以長久簡子曰甚哉禮之大也對曰  
禮上下之紀天地之經緯也民之所以生也是以先王  
尚之故人之能自曲直以赴禮者謂之成人大不亦宜  
乎簡子曰鞅也請終身守此言也 定公四年反自召  
陵鄭子大叔未至而卒晉趙簡子為之臨甚哀曰黃父



之會夫子語我九言曰無始亂無怙富無恃寵無違同  
無教禮無驕能無復怒無謀非德無犯非義 八年鄭  
駟歆嗣子大叔為政 九年鄭駟歆殺鄧析而用其竹  
刑君子謂子然於是不忠苟有可以加於國家者棄其  
邪可也靜女之三章取彤管焉竿旒何以告之取其忠  
也故用其道不棄其人詩云蔽芾甘棠勿剪勿伐召伯  
所爰思其人猶愛其樹况用其道而不恤其人乎子然  
無以勸能矣

補列子鄧析操兩可之說設無窮之辭當子產執政  
作竹刑鄭國用之數難子產之治子產屈之子產執  
而戮之俄而誅之然則子產非能用竹刑不得不用  
鄧析非能屈子產不得不屈子產非能誅鄧析不得  
不誅也

哀公五年鄭駟秦富而侈嬖大夫也而常陳卿之車服  
於其庭鄭人惡而殺之子思曰詩曰不解於位民之攸  
墜不守其位而能久者鮮矣商頌曰不僭不濫不敢怠

皇命以多福

臣士竒曰鄭之為國族大寵多俗淫而侈又介晉楚之間疆場日駭民生墊隘未易以為治而子產之相鄭則大有可觀矣方子國子耳之侵蔡而獲公子燮也國人皆喜子產年猶童子即慮晉楚兵爭之禍固已竒矣西宮之亂庀羣司閉府庫而後出兵倉卒之中具有成畫子孔載書之誤則力請焚之使反側子自安子皙與子南爭室子南以戈

擊子哲傷數其五奸抗法不少貸及子哲欲去游氏而代其位將作亂使吏切責尸諸衢而加木馬刑政肅矣其治民也有惠愛之心而濟之以猛水濡火烈之喻殆即亂國用重典之意乎他若鑄刑書制參辟立謗政作溝洫行之一年而豎子不狎班白不提挈二年市不豫賈三年門不夜闔道不拾遺四年田器不歸五年士無尺籍喪期不令而治至妖妄誕譎之習凡可以惑民聽沮教令者屏

之務絕伯有之厲立其祀以安之龍鬪涓淵則置  
而弗問裨竈請禳火則始終援天道人道以折之  
此其卓識遠見豈流輩所能及哉若夫馳詞執禮  
以當晉楚之鋒徵朝則歷述比歲之勤重幣則寓  
宣子之書獻捷則士莊伯不能詰壞館垣則叔向  
歎其有辭却逆女則楚人垂橐而入拒玉環之請  
則杜無厭之求申登陴之對則寢問罪之端問駟  
乞之立則語以縣鄙之懼而多聞博物又足以傾

動四國之諸侯而照耀乎壇坫是以外捍牧圉內庇民社而遺愛所被既沒而悲之如亡親戚也子

產不誠賢相矣哉雖然無罕虎則子產之賢不彰

無子大叔則子產之賢亦不傳此君子所以重汲

引也

左傳紀事本末卷四十四